

# FONDACIJA MUHAREM BERBIĆ



# FMB

FONDACIJA  
MUHAREM BERBIĆ

## IZVJEŠTAJ O RADU ZA 2020. GODINU

## SADRŽAJ

<b>1. O Fondaciji Muharem Berbić</b> .....	4
<b>2. Misija, vizija i strateški ciljevi</b> .....	5
2.1. Misija Fondacije Muharem Berbić .....	5
2.2. Vizija Fondacije Muharem Berbić.....	6
2.3. Ciljevi i djelatnosti Fondacije Muharem Berbić .....	6
<b>3. Redovni program Fondacije Muharem Berbić</b> .....	7
3.1. Stipendiranje učenika i studenata.....	7
3.2. Pružanje stručne i finansijske pomoći za projekte i aktivnosti drugim organizacijama u BiH.....	8
3.2.1. Projekat „Savjetodavni servis za roditelje i djecu sa urođenim srčanim anomalijama“ .....	8
3.2.2. Podrška aktivnostima Plivačkog Kluba „SPID“ .....	9
3.2.3. Opremanje multifunkcionalnog kabineta u OŠ „D. Obradović“ .....	9
3.2.4. Projekat podjele tableta učenicima osnovnih škola tokom pandemije .....	10
3.2.5. Dodjela sadnica i rasadnog materijala za udruženja i poljoprivredne proizvođače.....	10
3.2.6. Podrška za izdavanje knjige.....	11
3.2.7. Podrška osnivanju male trgovine za prodaju zdrave hrane .....	11
3.2.8. Podrška Pozorištu mladih Sarajevo.....	12
3.2.9. Nabavka knjiga za Osnovnu školu „Jala“ Tuzla.....	12
3.2.10. Podrška pri printanju knjige „Djeca nurom obasjana“, Dženana Božalija.....	13
3.2.11. Heroji i heroine zajednice u borbi protiv COVID – 19 .....	13
<b>4. Projekti Fondacije Muharem Berbić podržani od drugih donatora</b> .....	14
4.1. Projekat „Budi promjena!“.....	14
4.2. Klub prijatelja Fondacije Muharem Berbić.....	14
4.3. Projekat „(OD)govori već jednom!“ .....	14
4.4. Projekat „Sruši tarabu, izgradi ćupriju“ .....	15
4.5. Projekat „Inkluzija za budućnost“ .....	15
4.6. Projekat „Od marginalizacije do uključenosti“ .....	16
4.7. Razvojni centar Visoko.....	16
4.8. Projekat „2. konferencija mladih u BiH“ .....	16
4.9. Projekat „Princ / princeza možeš biti ti“ .....	17

4.10. Projekat „Moje pravo da radim“ .....	17
<b>5. Vidljivost Fondacije Muharem Berbić u medijima</b> .....	<b>18</b>
<b>6. FINANSIJSKI IZVJEŠTAJ</b> .....	<b>18</b>
6.1. Finansijski izvještaj za pojedinačne projekte .....	18
6.2. UKUPAN Bilans prihoda i rashoda .....	19
<b>Kontakt informacije</b> .....	<b>20</b>

## 1. O Fondaciji Muharem Berbić

Fondacija Muharem Berbić (FMB) osnovana je sredinom 2015. godine. Odmah nakon osnivanja, Fondacija je počela provoditi svoje projekte unutar lokalnih zajednica u Bosni i Hercegovini. Uprkos kratkom periodu postojanja, aktivno smo sudjelovali i uspješno realizovali brojne projekte i aktivnosti. Važno je istaći da je Fondacija Muharem Berbić jedan od prvih filantropskih organizacija unutar bosanskohercegovačkog društva i pravi bosanskohercegovački „proizvod“.

Osnovna svrha rada i postojanja Fondacije je pružanja direktne pomoći pojedincima, ali i zajednici u cjelini. Želja nam je da utičemo na određene društvene segmente za koje smatramo da su važni za napredak društvene zajednice u našoj zemlji, od kojih posebno ističemo obrazovanje, jačanje kapaciteta djece i mladih te zdravstvo. Iako su naše usluge namijenjene potpunom stanovništvu, u svom radu se posebno fokusiramo na djecu i mlade iz marginaliziranih skupina, a posebno na djecu i mlade sa invaliditetom, djecu i mlade bez roditeljskog staranja i djecu i mlade koji dolaze iz porodica sa niskim socio-ekonomskim statusom.

Fondacija je registrovana kod Federalnog ministarstva pravde FBiH te je upisana u Registar fondacija FBiH pod brojem 184, knjiga I Registra, dana 08.06.2015. godine.

Organi upravljanja i rada Fondacije Muharem Berbić su:

- Upravni odbor,
- Direktorica,
- Uposlenici FMB-a.

Upravni odbor Fondacije je najviši organ odlučivanja i upravljanja Fondacije, a čine ga tri člana u slijedećem sastavu: Zijad Berbić, koji je ujedno i osnivač Fondacije i predsjednik UO, Selma Berbić (potpredsjednica UO) i Zijada Berbić.

Prema Članu 11. Statuta FMB, Upravni odbor obavlja sljedeće aktivnosti:

- ostvaruje ciljeve Fondacije utvrdene u Statutu;
- daje saglasnost za pravne radnje koje su preduzete u ime Fondacije;
- upravlja imovinom Fondacije;
- vrši izmjene i dopune Statuta i drugih akata Fondacije, ukoliko nije drugačije utvrđeno Statutom;
- donosi Poslovnik o svome radu;
- utvrđuje Strategiju i program rada Fondacije;
- imenuje i razrješava Direktora\_icu ili drugo lice ovlašteno za zastupanje i predstavljanje Fondacije i vrši nadzor njihovog rada;

- odlučuje o pripajanju, razdvajanju, transformaciji i prestanku rada Fondacije;
- priprema i usvaja godišnji plan finansijskih sredstava;
- vrši nadzor finansijskog poslovanja Fondacije;
- odlučuje o kupovini i prodaji imovine Fondacije;
- donosi odluke o osnivanju ureda Fondacije izvan njenog sjedišta;
- odlučuje o svim pitanjima koja nisu u nadležnosti drugih tijela Fondacije;
- vrši druge poslove u skladu sa Statutom i Zakonom.

Direktorica Fondacije, Rješenjem broj 03-05-1-490/19 od dana 08.07.2019. godine je gospođa Halida Sinanović-Sarač. Direktoricu Fondacije imenuje Upravni odbor Fondacije na period od tri godine, s mogućnošću reizbora. Direktorica Fondacije obavlja sljedeće:

- zastupa i predstavlja Fondaciju u pravnom prometu;
- osigurava zakonitost u radu Fondacije;
- provodi politiku, zaključke i odluke Upravnog odbora;
- obavještava javnost o radu i rezultatima rada Fondacije;
- priprema i predlaže mjere i aktivnosti za razvoj i unapređenje rada Fondacije;
- uspostavlja i razvija saradnju sa drugim organizacijama, udruženjima i ustanovama;
- vodi poslovne knjige i podnosi godišnje ili periodične izvještaje o svom radu i poslovanju Fondacije Upravnom odboru na usvajanje;
- obnaša i druge poslove određene Zakonom, Statutom i drugim opštim aktima Fondacije.

Direktorica za svoj rad odgovara Upravnom odboru Fondacije, kome najmanje jednom godišnje, u pisanoj formi podnosi izvještaj o imovini Fondacije, korištenju imovine, prihodima i rashodima Fondacije i drugim pitanjima od značaja za raspolaganje imovinom i za finansijsko poslovanje Fondacije.

Uposlenici Fondacije Muharem Berbić predstavljaju tijela koja, po nalogu direktorice, provode politike, realizuju programe i projekte Fondacije Muharem Berbić. U 2020. godini Fondacija Muharem Berbić je povećala broj svojih uposlenika, sa dva uposlenika na početku godine, na osam uposlenika koliko smo imali na kraju 2020. godine.

Ovim je naša Fondacija postala jedna od najbrže rastućih nevladinih organizacija u Bosni i Hercegovini, te se time pozicionirala na mjesto lidera u programskim oblastima kojima se bavi.

## **2. Misija, vizija i strateški ciljevi**

### **2.1. Misija Fondacije Muharem Berbić**

Osnovna misija Fondacije Muharem Berbić je:

Kroz rad Fondacije nastojimo zajedničkim snagama poboljšati uslove kako pojedinaca tako i društva u cjelini. Činimo to, između ostalog, kroz stipendiranje uspješnih studentata i učenika, projekte samopomoći i druge raznovrsne podsticajne mjere u oblasti privrede, obrazovanja i zdravstva.

## 2.2. Vizija Fondacije Muharem Berbić

Vizija i motivi djelovanja Fondacije Muharem Berbić na prostoru Bosne i Hercegovine su:

- Zemlja u kojoj je kvalitetno obrazovanje i medicinska skrb dostupna svakom pojedincu, društvo u kojem ljudi jedni drugima pomažu, vođeni uvjerenjem da se samo dobro vraća dobrim.
- Stabilna i solidarna zajednica, u kojoj svi vrše svoj doprinos da poboljšaju ukupne uslove življenja, kako današnje tako i budućih generacija.
- Da svi počnemo našu zajedničku domovinu uređivati na način da od nje učinimo mjesto, koje niko ne želi napustiti.
- Svako ima nešto, što može doprinijeti dobrobiti društva.
- „Ko učini trun dobra, vidjet' će ga.“

## 2.3. Ciljevi i djelatnosti Fondacije Muharem Berbić

Osnovni ciljevi i djelatnosti Fondacije Muharem Berbić na osnovu kojih se planiraju naši projekti i programi su definisani Statutom. Navedeni ciljevi i djelatnosti su:

1. unapređenje obrazovanja i odgoja na način koji uključuje i pomoć studentima i đacima putem dodjele stipendija, jednokratnih novčanih pomoći ili stvaranja obrazovnih institucija kojima se obezbjeđuju bolji uslovi za školovanje, studij, prekvalifikaciju ili edukaciju;
2. unapređenje pomoći starijim osobama i omladini;
3. unapređenje ciljeva iz oblasti kulture i sporta;
4. zalaganje za unapređenje razvojne pomoći, te oblasti zdravstva;
5. pomoć iznemoglim osobama;
6. pomoć žrtvama elementarnih nepogoda;
7. zalaganje i iniciranje otvaranja đачkih domova na način predviđen Zakonom;
8. zalaganje za pomoć demobilisanim borcima Armije Bosne i Hercegovine i članovima porodica šehida;
9. pomoć ženama žrtvama nasilja i samohranim majkama sa maloljetnom djecom;
10. implementacija posebnih projekata u skladu sa svrhom osnivanja;

11. organizovanje dobrotvornih aktivnosti za prikupljanje i raspodjelu materijalnih sredstava na humanitarnoj i neprofitnoj osnovi;
12. obavljanje drugih dobrotvornih aktivnosti u skladu sa važećim zakonima, s opštim aktima i programom rada Fondacije.

### 3. Redovni program Fondacije Muharem Berbić

Redovni program koji Fondacija Muharem Berbić provodi u lokalnim zajednicama mogu biti podjeljeni na dva dijela. Prvi dio jeste program stipendiranja učenika srednjih škola i studenata na različitim univerzitetima u Bosni i Hercegovini. Drugi program je pružanje stručne i finansijske pomoći za provedbu različitih projekata i aktivnosti, a koji se realizuju od strane drugih nevladinih organizacija u Bosni i Hercegovini.

#### 3.1. Stipendiranje učenika i studenata

Od prvog dana osnivanja, Fondacija Muharem Berbić je kroz program stipendiranja učenika i studenata podsticala njihovo dalje uspješno školovanje.

FMB je tokom 2020. godine obezbjedila stipendije za 50 učenika srednjoškolaca i studenata. Ove stipendije su uplaćivane na osnovu sredstava Fondacije Muharem Berbić, ali i uz pomoć naših partnera koji dolaze iz sektora privrede i fizičkih lica.

Stipendistima srednje škole isplaćuje se stipendija u mjesečnom iznosu od 50 KM, a studentima u iznosu od 100 KM tokom svih dvanaest mjeseci. Učenicima srednjih škola i studentima sa izuzetnim rezultatima (2) isplaćuje se stipendija u mjesečnom iznosu od 150 KM.

Ovaj program Fondacije Muharem Berbić je posebno važan za djecu i mlade koji dolaze iz porodica sa niskim socio-ekonomskim statusom. Pored toga, putem stipendija Fondacije Muharem Berbić pomaže se i direktno školovanje djece i mladih sa invaliditetom te djece i mladih bez roditeljskog staranja.

U odnosu na 2019. godinu, broj stipendista u 2020. godini je povećan za 9%, a čime se nastavio trend povećanja broja stipendista Fondacije Muharem Berbić.

Kako bismo održali ovaj trend, Fondacija Muharem Berbić je pokrenula nekoliko akcija i medijskih kampanja, sa osnovnim ciljem prikupljanja sredstava kojima će biti obezbijeđeno finansiranje ovih stipendija. Kroz kampanje je postignuto povećanje broja donacija koje se uplaćuju FMB-u sa ovom svrhom. Međutim, taj omjer je još uvijek nepovoljan obzirom da se velika većina sredstava isplaćuje iz vlastitog fonda Fondacije Muharem Berbić. Zbog toga ćemo u budućnosti, posebnu pažnju posvetiti aktivnostima prikupljanja sredstava za programe stipendiranja.

### 3.2. Pružanje stručne i finansijske pomoći za projekte i aktivnosti drugim organizacijama u BiH

Usljed povećanja vlastitih aktivnosti i broja sopstvenih projekata, tokom 2020. godine je realizovano manje aktivnosti u okviru ovog programa, a u odnosu na 2019. godinu. Međutim, bez obzira na veća finansijska izdvajanja koja smo realizovali za vlastite projekte, Fondacija Muharem Berbić je nastavila da podržava aktivnosti direktne pomoći projektima i aktivnostima drugih vladinih i nevladinih organizacija u BiH.

Pored toga, dio naših sredstava je bio usmjeren i na pružanje pomoći za sprječavanje negativnih posljedica izazvanih pandemijom virusa COVID – 19. Detaljniji opisi načina i vrste dodjeljene pomoći za druge organizacije se nalaze u nastavku.

#### 3.2.1. Projekat „Savjetodavni servis za roditelje i djecu sa urođenim srčanim anomalijama“

<i>Partnerska organizacija:</i>	Udruženje roditelja i djece sa urođenim srčanim anomalijama
<i>Vremenski period realizacije:</i>	januar 2020. godine – mart 2020. godine
<i>Mjesto realizacije:</i>	Kanton Sarajevo

Udruženje roditelja i djece sa urođenim srčanim anomalijama je pravni subjekt koji jedini u Bosni i Hercegovini okuplja i pruža podršku roditeljima djece sa urođenim srčanim anomalijama. Samo Udruženje je registrovano tokom 2019. godine, bez većih realizovanih projekata.

Fondacija Muharem Berbić je prvi donator koji je podržao projekat ovog Udruženja, sa osnovnom svrhom edukacije roditelja djece sa urođenim srčanim anomalijama kako bi se poboljšao kvalitet njihovog života, omogućila brža razmjena informacija, te unaprijedio zdravstveni odgovor u prvim kritičnim trenucima. Sam projekat je realizovan tokom tri mjeseca, na početku godine i to u periodu od januara do marta mjeseca.

Kroz projekat su se uradile različite edukativne radionice za roditelje, zabavne i kreativne radionice za djecu, ali i brojna predavanja koja su vođena od eminentnih ljekara i doktora koji se bave kardiovaskularnim liječenjem djece i mladih.

Iako je planirani period realizacije projekta bio duži, zbog iznenadne pandemije izazvane virusom COVID – 19, projekat je morao biti prekinut. Naime, djeca iz ove populacije pripadaju rizičnoj populaciji koja može imati velike posljedice ukoliko se zaraze virusom, tako da su sve daljnje aktivnosti morale biti odgođene.

Navedeni projekat je podržan iznosom od 2.000,00 KM.



### 3.2.2. Podrška aktivnostima Plivačkog Kluba „SPID“

<i>Partnerska organizacija:</i>	Plivački Klub „SPID“
<i>Vremenski period realizacije:</i>	februar 2020. godine – decembar 2020. godine
<i>Mjesto realizacije:</i>	Sarajevo

Obzirom da su osobe sa invaliditetom jedna od osnovnih ciljnih skupina aktivnosti i projekata Fondacije Muharem Berbić, nastavak pružanja podrške Plivačkom Klubu SPID se nametnuo kao prioritet programa pružanja finansijske podrške drugim organizacijama.

Putem podrške koju je Fondacija Muharem Berbić obezbijedila ovom partneru, imali smo zadovoljstvo omogućiti besplatne treninge za 84 korisnika njihovih usluga, primarno iz kategorije djece i mladih, a koja spadaju u grupu osoba sa invaliditetom. Putem naše podrške, korisnici usluga PK „SPID“ su imali mogućnost korištenja dva termina sedmično, a sve sa ciljem razvoja motorike, socijalizacije i druženja sa vršnjacima.

Iako je Fondacija Muharem Berbić predvidjela veća sredstva za podršku ovom Klubu, pandemija je, nažalost, zaustavila i njihov rad. Međutim, našu podršku smo nastavili pružati sve do kraja 2020. godine.

Ukupna sredstva koja su izdvojena za podršku Plivačkom Klubu „SPID“ iznose 7.000,00 KM.

### 3.2.3. Opremanje multifunkcionalnog kabineta u OŠ „D. Obradović“

<i>Partnerska organizacija:</i>	Osnovna škola „D. Obradović“ Kneževo (Skender Vakuf)
<i>Vremenski period realizacije:</i>	mart 2020. godine – april 2020. godine
<i>Mjesto realizacije:</i>	Skender Vakuf

Fondacija Muharem Berbić je, u mjesecu februaru 2020. godine, dobila Molbu za podršku u opremanju multifunkcionalnog kabineta za učenike Osnovne škole „D. Obradović“. Obzirom da je Fondacija Muharem Berbić zagovornik unapređenja kvalitete obrazovnog procesa u Bosni Hercegovini, odlučili smo da podržimo ovu akciju. Tokom mjeseca marta 2020. godine, Fondacija Muharem Berbić je nabavila sljedeću opremu za opremanje kabineta i to: dva računara, jedan projektor, jedno projektorsko platno, prateću opremu za računare (monitori, miševi, tastature), te printer.

Sama oprema je korištena i tokom pandemije korona virusa, obzirom da su nastavnici istu koristili za potrebe održavanja online nastave. Ovaj projekat je predstavljao početak saradnje između Fondacije Muharem Berbić i Osnovne škole „D. Obradović“, te se u narednom periodu planiraju realizovati različite aktivnosti sa djecom iz ove škole.

Ukupna vrijednost donirane opreme je iznosila 2.200,00 KM.

### 3.2.4. Projekat podjele tableta učenicima osnovnih škola tokom pandemije

<i>Partnerske organizacije:</i>	Osnovna škola „Malta“, Crveni križ općine Kakanj, Osnovna škola „Hadžići“
<i>Vremenski period realizacije:</i>	april 2020. godine – maj 2020. godine
<i>Mjesto realizacije:</i>	Sarajevo, Kakanj, Hadžići

Usljed pandemije izazvane virusom COVID – 19, škole sa područja čitave Bosne i Hercegovine su zatvorile svoja vrata, a nastava se odvijala online. Međutim, brojni učenici osnovnih i srednjih škola koji žive u porodicama sa niskim socio-ekonomskim statusom nisu imali mogućnost redovno pratiti nastavu, upravo zbog nemogućnosti kupovine potrebnih uređaja.

Također, pandemija korona virusa je izazvala i brojne posljedice za kompletnu društvenu zajednicu, te su brojni pojedinci ostali bez posla, smanjena su izdvajanja za obrazovanje, onemogućen je daljnji privredni rast. Zbog svega toga, Fondacija Muharem Berbić je odlučila da dio svojih sredstava usmjeri ka nabavci tableta koji će biti podjeljeni školama, a sa ciljem lakšeg prevazilaženja posljedica.

Tokom dva mjeseca, Fondacija Muharem Berbić je nabavila i podjelila 27 tableta koji su distribuirani učenicima iz tri grada i općine i to: Bratunac, Hadžića i Kakanja.

Podjela tableta u Bratuncu je izvršena putem Osnovne škole „Malta“ iz Sarajeva. Obzirom da ova škola ima otvorenu područnu školu u Konjević Polju, općina Bratunac, učenicima čije porodice su povratnici u Konjević Polje su dodijeljeni 15 tableta. Podjela tableta je urađena na način da su isti poklonjeni školi u trajno vlasništvo. Učenici su imali priliku uzeti tablete na revers, te ih, nakon korištenja vratiti školi.

Po istom principu je urađena podjela tableta i u Osnovnoj školi „Hadžići“. Međutim, podjeljeni tableti u Crvenom križu općine Kakanj su podjeljeni djeci iz porodica sa niskim socio-ekonomskim statusom u trajno vlasništvo, bez obaveze vraćanja. Od ukupnog broja podjeljenih tableta, pet ovih uređaja je podjeljeno na način trajnog vlasništva.

Iako je ova aktivnost bila neplanirana našim godišnjim planom, njena realizacija je bila neophodna zbog situacije u kojoj smo se našli.

Ukupna vrijednost podjeljenih tableta je iznosila 6.769,55 KM.

### 3.2.5. Dodjela sadnica i rasadnog materijala za udruženja i poljoprivredne proizvođače

<i>Partnerske organizacije:</i>	Organizacije iz Bosne i Hercegovine
<i>Vremenski period realizacije:</i>	april 2020. godine – juni 2020. godine
<i>Mjesto realizacije:</i>	područje Bosne i Hercegovine

Usljed brojnih posljedica koje je pandemija virusa COVID – 19 ostavila na pojedina fizička lica, privredne subjekte i kompletno društvo, Upravni Odbor FMB-a je odlučio da sredstva koja su bila namijenjena za pružanje podrške drugim organizacijama, usmjeri ka pružanju pomoći ugroženom stanovništvu.

Obzirom da je politika Fondacije Muharem Berbić usmjerena ka postizanju dugoročnih ciljeva, odlučili smo se da svoja sredstva uložimo u nabavku rasada i sadnog materijala za udruženja, pojedince i privredne subjekte. Ovim postupkom, Fondacija Muharem Berbić je uticala na kontrolisanje tržišta cijena poljoprivrednih proizvoda, a samim tim i na kontrolisanje njihove ponude i potražnje.

Tokom, mjeseca aprila podjeljena je prva donacija za Udruženje žena „Zvijezda“ iz Vareša, zatim Udruženju žena „Sehara“ iz Goražda. U saradnji sa Islamic Relijef-om Bosne i Hercegovine, najugroženijim članicama Udruženja „Sehara“ podjeljeni su i prehrambeni paketi, ukupno 30 komada.

Nakon ovoga, radi veće potražnje za sadnicama i rasadnim materijalom, Fondacija Muharem Berbić otvara Javni poziv za dodjelu ovog materijala. U petnaest dana otvorenog poziva, pristiglo je preko 30 prijava, od kojih je selektovano 10 korisnika našeg programa, a koji su iskazali interes za dobijanjem ovog materijala. Sa svim korisnicima su potpisani ugovori, te se u trenutku pisanja ugovora počeo vršiti monitoring utroška dodjeljenih sredstava.

Ukupna vrijednost doniranih sredstava za sve korisnike ovog projekta je iznosila 13.894,40 KM.

### 3.2.6. Podrška za izdavanje knjige

<i>Partnerska organizacija:</i>	Organizacije iz Bosne i Hercegovine
<i>Vremenski period realizacije:</i>	april 2020. godine – august 2020. godine
<i>Mjesto realizacije:</i>	područje Bosne i Hercegovine

Na osnovu upućene molbe i zahtjeva za pružanje podrške pri realizaciji projekata i aktivnosti, upućene od strane Udruženja „Nela“ iz Orašja, Upravni Odbor Fondacije se odlučio da podrži napore ovog Udruženja za postizanje rodne ravnopravnosti žena u bosanskohercegovačkom društvu.

Udruženje „Nela“ iz Orašja je tokom 2020. godine otpočela sa izdavanjem knjige koja predstavlja sabrana djela o 12 žena iz 12 lokalnih zajednica unutar Bosne i Hercegovine, a u sklopu koje su opisane priče o njihovim svakodnevnim izazovima, njihovim borbama, nadanjima i strahovima.

Uplaćena sredstva su se koristila za potrebe lektorisanja i štampanja, a knjiga će nositi naziv „Snaga žene“.

Odobrena sredstva za ovaj projekat iznose 700,00 KM.

### 3.2.7. Podrška osnivanju male trgovine za prodaju zdrave hrane

<i>Partnerska organizacija:</i>	pojedinaac
<i>Vremenski period realizacije:</i>	april 2020. godine – maj 2020. godine
<i>Mjesto realizacije:</i>	područje općine Vogošća

Obzirom da je jedan od osnovnih ciljeva rada i djelovanja Fondacije Muharem Berbić podrška razvoju i razvojnim aktivnostima u lokalnim zajednicama, a čime se postiže unapređenja položaja marginaliziranih skupina, Fondacija Muharem Berbić je odlučila da podrži osnivanje jednog malog preduzeća.

Navedeno preduzeće je otvoreno u Vogošći, od strane žene, čime smo uticali na povećanje ženskog poduzetništva. Preduzeće se bavi prodajom i plasmanom organske hrane, odnosno plasmanom voća i povrća.

Ukupna sredstva koja su usmjerena za ovu podršku iznose 5.000,00 KM.

### 3.2.8. Podrška Pozorištu mladih Sarajevo

<i>Partnerska organizacija:</i>	Pozorište mladih Sarajevo
<i>Vremenski period realizacije:</i>	oktobar 2020. godine
<i>Mjesto realizacije:</i>	Sarajevo

Obilježavanje 70 godina postojanja i rada Pozorišta mladih Sarajevo je bila prilika da se uključimo u akciju podrške ove značajne institucije. Iako je obilježavanje 70 godina postojanja ove značajne institucije organizovano tokom vremena pandemije, kompletan program je prenošen online.

Važno je istaći da je Fondacija Muharem Berbić bila jedan od dva donatora koji su podržali obilježavanje rada i djelovanja ove značajne institucije.

Podrška naše Fondacije je iznosila 1.500,00 KM.

### 3.2.9. Nabavka knjiga za Osnovnu školu „Jala“ Tuzla

<i>Partnerska organizacija:</i>	Osnovna škola „Jala“ Tuzla
<i>Vremenski period realizacije:</i>	februar 2020. godine
<i>Mjesto realizacije:</i>	Tuzla

Tokom 2020. godine, na adresu Fondacije Muharem Berbić je stigao veliki broj zahtjeva za pružanjem pomoći u unapređenju obrazovnog procesa. Jedan od takvih zahtjeva je i zahtjev Osnovne škole „Jala“ iz Tuzle, a koja je od FMB-a tražila pomoć pri nabavci knjiga za školsku biblioteku. S obzirom da je primarna misija naše Fondacije unapređenje kvalitete obrazovanja, rado smo se odazvali ovoj akciji. Kroz našu podršku nabavljeno je ukupno 64 primjerka knjige, sedam arzičnih naslova, te su isti donirani ovoj školi.

Ukupno je za ovu aktivnosti izdvojeno 994,00KM.

### 3.2.10. Podrška pri printanju knjige „Djeca nurom obasjana“, Dženana Božalija

<i>Partnerska organizacija:</i>	Pojedinka
<i>Vremenski period realizacije:</i>	juni 2020. – novembar 2020. godine
<i>Mjesto realizacije:</i>	Bosna i Hercegovina

Još jedan projekat iz oblasti obrazovanja i kulture jeste i podrška pri štampanju knjige „Djeca nurom obasjana“, autorice Dženane Božalija. Autorica je nakon opširnog istraživanja došla do saznanja, da postoji manjak islamske poezije za djecu na bosanskom jeziku. Potaknuta tom činjenicom sama se posvetila navedenoj temi te napisala i pripremila islamsku poeziju za dječiji uzrast. Pored ostalih već planiranih projekta Fondacija Muharem Berbić je uspjela jedan dio sredstava usmjeriti za štampanje gore navedenog djela.

Za štampanje je izdvojeno ukupno 500,- KM.

### 3.2.11. Heroji i heroine zajednice u borbi protiv COVID – 19

<i>Partnerska organizacija:</i>	Pojedinci i pojedinke
<i>Vremenski period realizacije:</i>	mart 2020. – maj 2020. godine
<i>Mjesto realizacije:</i>	Bosna i Hercegovina

Pandemija virusa COVID – 19 koja je prouzrokovala potpuno zatvaranje privrednih, javnih i društvenih sadržaja, rezultirala je kolektivnim buđenjem empatije kod stanovništva Bosne i Hercegovine. U želji da nagradimo, ali i istaknemo pojedince i pojedinke koji su se borili sa posljedicama pandemije poput medicinskih radnika, volontera i volonterki, aktivista, privrednika i drugih, Fondacija Muharem Berbić je pokrenula kampanju „Heroji i heroine u borbi protiv COVID – 19“. Svaki građanin i građanka u Bosni i Hercegovini su mogli da nominuju svoje heroje i heroine, a nakon zatvaranja nominacija svi su mogli da daju svoj glas za te noviminovane osobe. Glasalo se na način da se objava sa imenom, prezimenom i opisom radnog mjesta heroja ili heroine lajka, dijeli i komentariše. Pobjednik ove aktivnosti je bila Nanastacija Ćorović iz Banja Luke, sa adresom prebivališta u Foči koja je jedna od najaktivnijih volonterki u Bosni i Hercegovini. Anastasija je dobila novčanu nagradu za svoj rad i tru, a svi nominovani heroji i heroine su dobili priznanje. Za ovu aktivnost je izdvojeno ukupno 450,00KM.

Ukupna vrijednost podrške kojom je Fondacija Muharem Berbić podržala druge organizacije i pojedince, tokom 2020. godine, bez programa stipendiranja iznosi 38.566,16 KM.

## 4. Projekti Fondacije Muharem Berbić podržani od drugih donatora

### 4.1. Projekat „Budi promjena!“

<i>Donator:</i>	Institut za razvoj mladih KULT
<i>Vremenski period realizacije:</i>	august 2020. – novembar 2020. godine
<i>Mjesto realizacije:</i>	Sarajevo, Ilijaš, Visoko

Polazeći od činjenice da u Bosni i Hercegovini mladi ljudi predstavljaju marginaliziranu skupinu bosanskohercegovačkog društva, te da se za unapređenje položaja moraju boriti sami, odlučili smo se za provođenje aktivnosti kojima će se mladi potaknuti da budu nosioci društvenih promjena. Kroz četiri mjeseca, a u okviru projekta „Budi promjena!“ odrađeno je pet edukativnih radionica, dvije kampanje, organizovani sastanci sa novoizabranim načelnicima i podstaknuti mladi da budu kreatori vlastite budućnosti.

Realizacija aktivnosti u sklopu projekta „Budi promjena!“ podržana je od strane Instituta za razvoj mladih KULT.

### 4.2. Klub prijatelja Fondacije Muharem Berbić

<i>Donator:</i>	Vlastita sredstva i sredstva privrednih subjekata
<i>Vremenski period realizacije:</i>	januar 2020. – trajno
<i>Mjesto realizacije:</i>	Kakanj

Tokom 2019. godine, Fondacija Muharem Berbić je započela aktivnosti na uspostavljanju Kluba prijatelja Fondacije Muharem Berbić u kojem će biti zaposleno osam osoba sa invaliditetom i šest njihovih asistenata. U januaru 2020. godine, Općina Kakanj je Rješenjem dodijelila prostor Fondaciji na period od 9,5 godina, površine 145 m<sup>2</sup>.

Nakon ovoga, pristupljeno je izradi idejnog i glavnog projekta za adaptaciju i sanaciju prostora, a nakon čega je pokrenuta kampanja prikupljanja sredstava. Do sada je u adaptaciju prostora Kluba uloženo preko 110.000 KM, a aktivnosti na uspostavi ovog značajnog projekta se nastavljaju i u budućnosti.

### 4.3. Projekat „(OD)govori već jednom!“

<i>Donator:</i>	TPO Fondacija
<i>Vremenski period realizacije:</i>	august 2020. – oktobar 2020. godine
<i>Mjesto realizacije:</i>	Visoko

U novembru mjesecu 2020. godine, u Bosni i Hercegovini su se održali lokalni izbori na kojima su svi građani i građanke mogli da biraju svog predstavnika u izvršnoj i zakonodavnoj vlasti na lokalnom nivou. Obzirom da FMB vjeruje u mlade ljude, kroz naš projekat smo pokušali da pomognemo mladim

kandidatima iz različitih političkih opcija, koji su se kandidovali za Gradsko Vijeće Visoko, kako bi dobili povjerenje građana, te da ih osnažimo i ojačamo njihove kapacitete za produktivan rad i brojne inicijative. Kroz aktivnosti projekta „(OD)govori već jednom!“ organizovane su radionice, edukacije, panel diskusije i javna predstavljanja kandidata, a sve sa svrhom povećanja stepena povjerenja u mlade pojedince i pojedinke kako bi dobili povjerenje građana na lokalnim izborima.

#### 4.4. Projekat „Sruši tarabu, izgradi ćupriju“

<i>Donator:</i>	Ministarstvo kulture i sporta KS
<i>Vremenski period realizacije:</i>	oktobar 2020. – novembar 2020. godine
<i>Mjesto realizacije:</i>	Sarajevo

Mi u Fondaciji Muharem Berbić čvrsto vjerujemo da mladi ljudi mogu biti nosioci svih društvenih procesa. Međutim, kako bi to mladi istinski i bili, potrebno ih je kontinuirano osnaživati. Kroz projekat „STIĆ“ omogućili smo edukaciju mladih iz oblasti kulturno-historijskog naslijeđa Bosne i Hercegovine, a sa ciljem promocije i afirmacije kulture i kulturnih identita Bosne i Hercegovine kroz koncept jedinstva u različitosti. Kroz projekat su organizovane posjete različitim kulturnim institucijama u Sarajevu, a koje su od značaja za Bosnu i Hercegovinu poput: Zemaljskog muzeja BiH, Vijećnice, Umjetničke galerije itd. Posebno je važno naglasiti da su na ovom projektu učestvovali i studenti Kulturalnih studija Univerziteta u Zenici.

#### 4.5. Projekat „Inkluzija za budućnost“

<i>Donator:</i>	Ministarstvo nauke, obrazovanja i mladih KS
<i>Vremenski period realizacije:</i>	novembar 2020. – maj 2021. godine
<i>Mjesto realizacije:</i>	Sarajevo

Jačanje kapaciteta djece i mladih, a posebno djece i mladih sa invaliditetom je jedan od najvažnijih fokusa djelovanja i rada Fondacije Muharem Berbić. Kroz svoj rad, Fondacija je uložila mnogo truda za stvaranje uslova kojima će se osigurati jednaki pristup obrazovanju za sve kategorije društva i ojačati obrazovna inkluzija. Projekat „Inkluzija za budućnost“ predstavlja pilot projekat koji se realizuje u saradnji sa Osnovnom školom „Malta“, a u sklopu kojeg se direktno radi sa djecom sa invaliditetom na savladavanju školskog gradiva, pisanju zadaće, različitim neformalnim radionicama. Ovaj projekat, zbog svog značaja i zanimljivosti sadržaja je podržan od strane Ministarstva obrazovanja, nauke i mladih Kantona Sarajevo, a aktivnosti istog imaju intenciju rasta i širenja. Tako su se zbog povećanog interesa, aktivnosti projekta počele provoditi i u kancelariji Fondacije Muharem Berbić.

#### 4.6. Projekat „Od marginalizacije do uključenosti“

<i>Donator:</i>	Općina Kakanj
<i>Vremenski period realizacije:</i>	oktobar 2020. – februar 2021. godine
<i>Mjesto realizacije:</i>	Kakanj

Položaj mladih osoba sa invaliditetom na području manjih lokalnih zajednica u Bosni i Hercegovini je jako težak. Osobe sa invaliditetom nisu dovoljno vidljive, imaju jako malo prilika za zaposlenje, socijalno i društveno uključivanje. Kroz ovaj projekat, naša želja je bila da pomognemo osobama sa invaliditetom da budu uključene u sve procese kako bi prezentovali svoje mogućnosti za rad, društvenu inkluziju i društvene aktivnosti. Projekat je finansijski podržan od strane Općine Kakanj putem granta za nevladine organizacije, a u sklopu projekta se organizovala i Novogodišnja gala večer Fondacije Muharem Berbić na kojem su osobe sa invaliditetom učestvovali kao konobari, imali reviju, organizovali bazar proizvoda i prezentovali svoje sposobnosti. Projekat je sa svojim aktivnostima nastavljen i u 2021. godini.

#### 4.7. Razvojni centar Visoko

<i>Donator:</i>	Vlastita sredstva i privatne donacije
<i>Vremenski period realizacije:</i>	august 2020. – trajno
<i>Mjesto realizacije:</i>	Visoko

Kako smo i predhodno istakli, Fondacija Muharem Berbić je organizacija koja posebnu pažnju posvećuje obrazovanju, stavljajući ga na pijadestal najvažnijih alata za unapređenje jedne grupe stanovništva. Vodeći se ovom svrhom, otvorili smo svoje kancelarije u Visokom, a u sklopu kojih smo zaposliti tri osobe. Želja nam je da djeca i mladi imaju stručnu pomoć i usluge kako bi na najkvalitetniji način savladali i naučili nastavne cjeline, imali stručnu pomoć pri izradi zadaće, dobili pomoć pri zadacima iz matematike, fizike, stranih jezika i bili što uspješniji učenici, te u budućnosti, što uspješniji pojedinci.

Razvojni centar Fondacije Muharem Berbić je jedinstven projekat koji radi na konceptu direktnog i individualnog rada sa djecom. Razvojni centar radi pet dana u sedmici, od osam do 21 sat.

#### 4.8. Projekat „2. konferencija mladih u BiH“

<i>Donator:</i>	Federalno ministarstvo kulture i sporta
<i>Vremenski period realizacije:</i>	august 2020. – decembar 2020. godine
<i>Mjesto realizacije:</i>	područje Bosne i Hercegovine

Kao i u 2019. godini, i tokom ove godine, rad Fondacije Muharem berbić je bio usmjeren na poboljšanje položaja djece i mladih. Još u 2019. godini, putem projekta 1. konferencije mladih radili smo analizu institucionalne podrške koju različiti nivoi vlasti pružaju prema zadovoljenju potreba mladih.



Druga konferencija mladih u BiH je nastavak ovih aktivnosti. Tako smo, kroz projekat, uradili upitnik i isti poslali na preko 100 adresa različiti institucija u našoj zemlji, uključujući entitetske, kantonalne i državni nivo. Rezultati provedene analize su predstavljeni na konferenciji u Ilijašu, održanoj 17. decembra 2020. godine. Na istoj su učestvovali predstavnici državnih institucija, federalnih ministarstava, zastupnici u federalnim parlamentima, ali i načelnici lokalnih zajednica. Obzirom da je pandemija virusa COVID – 19 onemogućila veći broj učesnika, sadržaj konferencije je predstavljen i online, te je istu pregledalo više od 1000 ljudi.

#### 4.9. Projekat „Princ / princeza možeš biti ti“

<i>Donator:</i>	Ministarstvo za obrazovanje, nauku, kulturu i sport ZDK
<i>Vremenski period realizacije:</i>	oktobar 2020. – decembar 2020. godine
<i>Mjesto realizacije:</i>	Kakanj

Ministarstvo za obrazovanje, nauku, kulturu i sport Zeničko-dobojskog kantona prepoznajući rad Fondacije Muharem Berbić podržalo je dva naša projekta, a jedan od njih je i navedeni projekat. Kroz isti su održane kreativne radionice za djecu tipične populacije, ali i djecu sa invaliditetom. Aktivnosti projekta su održane u Kakanju, a Novogodišnja gala večer Fondacije Muharem Berbić je bila prilika da se organizuju i aktivnosti ovog projekta.

#### 4.10. Projekat „Moje pravo da radim“

<i>Donator:</i>	Ministarstvo za obrazovanje, nauku, kulturu i sport ZDK
<i>Vremenski period realizacije:</i>	oktobar 2020. – decembar 2020. godine
<i>Mjesto realizacije:</i>	Kakanj

Promocija zapošljavanja osoba sa invaliditetom je jako važna oblast rada Fondacije Muharem Berbić. „Moje pravo da radim“ je projekat čija je osnovna svrha promocija zapošljavanja osoba sa invaliditetom. Obzirom da osobe iz ove kategorije na području Kakanja imaju pravo da koriste usluge Javne ustanove Centar za djecu i odrasle s posebnim potrebama Zeničko-dobojskog kantona, unutar ove ustanove mogu i da koriste usluge radno – okupacione terapije. Međutim, ovo nije dovoljna podrška obzirom da je za sveobuhvatnu društvenu inkluziju potrebno i zapošljavanje osoba sa invaliditetom, a zatim i povećanje samostalnosti, osnivanje porodice, kupovinu stana. Aktivnostima ovog projekta vršena je kontinuirana promocija upravo ovih segmenata koji su jako važni za osobe sa invaliditetom.

## 5. Vidljivost Fondacije Muharem Berbić u medijima

Zbog obilnosti projektnih aktivnosti, ali i vlastitih projektnih zadataka Fondacija Muharem Berbić je bila vrlo prisutna u svim oblicima medijskog oglašavanja. Internet portali, televizije, radio stanice su prenosile izvještaje sa naših projekata, pozivali nas na gostovanja.

Najviše objavljenih članaka tokom 2020. godine je bilo na lokalnim internet portalima u Visokom, Kaknju i Sarajevu. S druge strane i druge lokalne zajednice u Bosni i Hercegovini su, u većoj i manjoj mjeri, objavljivali članke o aktivnostima naše Fondacije.

Također, i naše stranice na društvenim mrežama su imali povećanje broja pratilaca. Na kraju 2019. godine broj pratilaca je iznosio oko 1.500. Međutim, trenutno dvije facebook stranice Fondacije Muharem Berbić prati oko 5.000 ljudi.

## 6. FINANSIJSKI IZVJEŠTAJ

### 6.1. Finansijski izvještaj za pojedinačne projekte

1. Savjetodavni servis za roditelje i djecu sa urođenim srčanim anomalijama	2.000,00
2. Podrška aktivnostima Plivačkog Kluba „SPID“	7.000,00
3. Opremanje multifunkcionalnog kabineta u OŠ „D. Obradović“	2.200,00
4. Podjela tableta učenicima osnovnih škola tokom pandemije	6.769,55
5. Dodjela sadnica i rasadnog materijala za udruženja i poljoprivredne	12.240,54
6. Podrška osnivanju male trgovine za prodaju zdrave hrane	5.000,00
7. Podrška Pozorištu mladih Sarajevo	1.500,00
8. Donacija za školsku biblioteku, OŠ „JALA“, Tuzla	994,00
9. Podrška pri printanju knjige poezija za djecu, Dženana Božalija	500,00
10. Heroji i heroine zajednice u borbi protiv COVID – 19	450,00
11. Projekat „Budi promjena!“ - KULT	4.131,90
12. Klub prijatelja Fondacije Muharem Berbić	46.452,27
13. Projekat „Sruši tarabu, izgradi ćupriju“	1.000,00
14. Projekat „Inkluzija za budućnost“	16.800,00
15. Projekat „Od marginalizacije do uključenosti“	3.000,00
16. Projekat „2. konferencija mladih u BiH“	8.000,00
17. Projekat „Princ / princeza možeš biti ti“	500,00

---

18. Projekat „Moje pravo da radim“	500,00
19. Razvojni centar Visoko	2.000,00
<b>PROJEKTI UKUPNO:</b>	<b>121.038,26</b>

---

6.2. UKUPAN Bilans prihoda i rashoda

<b>PRIHODI</b>	<b>IZNOS (KM)</b>
1 Individualne donacije	185.329,70
2 Korporativne donacije (Stipendije)	4.800,00
3 Grantovi	44.890,72
<b>PRIHODI UKUPNO:</b>	<b>235.020,42</b>

<b>RASHODI</b>	<b>IZNOS (KM)</b>
1. Plate, porezi i doprinosi zaposlenih	57.525,28
2. Troškovi energenata / kancelarija	1.266,65
3. Knjigovodstvene i bankarske usluge	3.956,65
4. Drugi administrativni troškovi	2.311,84
5. Stationery	2.301,46
6. Stipendije FMB	51.124,00
7. Troškovi projekata (5.1.)	121.038,26
<b>RASHODI UKUPNO:</b>	<b>239.524,14</b>



**FMB**  
FONDACIJA  
MUHAREM BERBIĆ

**KANCELARIJA SARAJEVO:** Hamdije Kreševljakovića 37, 033/221-459;  
**KANCELARIJA VISOKO:** Kralja Tvrtka 62, 062/004-333;  
**E - mail:** [info@fmb.foundation](mailto:info@fmb.foundation); **Web site:** [www.fmb.foundation](http://www.fmb.foundation);  
**ID broj:** 4202110080006;

## Kontakt informacije

Fondacija Muharem Berbić

Hamdije Kreševljakovića 38

Tel. +387 33 221 459

Web stranica: <https://www.fmb.foundation/>

**RADNO VRIJEME:**

Svaki radni dan, od 8:00 do 16:30 h.

## Upravni odbor

Zijad Berbić

Selma Berbić

Zijada Berbić

## Direktorica

Halida Sinanović-Sarač


## Predjednik UO

Fondacije Muharem Berbić

  
Zijad Berbić



## Direktorica Fondacije Muharem Berbić

  
Halida Sinanović-Sarač

Sarajevo, 30.12.2020. godine

---

**POZIVOM NA BROJ 090/291-057 DONIRATE 2 KM ZA ZAPOŠLJAVANJE OSOBA SA INVALIDITETOM  
U KLUBU PRIJATELJA FONDACIJE MUHAREM BERBIĆ**